

康熙臺灣府志

第二冊



禁飭種蔗并力種田示

高拱乾

為嚴禁申飭種蔗并力種田以期足食以重邦本事  
照得臺灣孤懸海外止此沿邊一線堪以墾耕地利  
民力原自有限而水陸萬軍之糧糈與數萬之民食  
惟于冬成稻穀是賴也雖此地之煖甚于內地然一  
年之耕種僅止一次收穫總因多風少雨播種插秧  
每有愆期故十年難必有五年之獲加以從前蝗魚  
之後繼以颶風稻穀斂收鮮有益藏正當盡力種稻  
期以充積倉儲預防歲歉庶可望含哺鼓腹樂享熙  
皞也不謂爾民弗計及此偶見上年糖價稍長惟利  
是趨舊歲種蔗已三倍于往昔今歲種蔗竟十倍于

舊年最爾之區力農止有此數分一人之力于園卽少一人之力于田多插一甲之蔗卽減收一甲之粟年復一年有加無已夫果不利爾民本道豈不樂從但爾民愚無遠慮止知種蔗澆糖便可取利殊不知人盡種蔗則出糖倍多糖多則價必賤不比上年之糖少價長也明矣在歲豐之日固可以糖易穀輸課并供糧食萬一復遇歲歉寡收稻穀種田有穀者除完課外計口防饑必不見貸于人爾種蔗者有糖不足以爲穀非特無以完公更思靡可餬口數萬軍民需米正多則兩隔大洋告糴無門縱向內地舟運動經數月誰能懸釜以待是爾民向以種蔗自利者不

幾以缺穀自禍歟本道監司茲土愛惜爾民其足食邦本不得不懇懇過慮也合就出示禁飭爲此示仰所屬士民人等知悉務各詳繹示飭至意須知競多種蔗勢必糖多價賤允無厚利莫如相勸種田多收稻穀上完正供下贍家口免遇災歉呼饑稱貸無門尤爲有益除行縣確查將開過蔗園按畝清查通報起科外倘敢仍前爭効種蔗以致將來有悞軍糈自干提究噬臍莫及其凜遵之勿忽

序

捐脩諸羅縣學宮序

高拱乾

繼往開來道莫高于

夫子梯山航海治莫盛于

國朝至治之徵無思不服大道之象有目具瞻是以  
萬乘最尊猶敦師禮百蠻殊俗咸被文風自天下建學以  
來數仞宮牆比崇日月人材于是乎出教化于是乎  
興故瞻其居重其道則為名將相為賢卿大夫為貞  
婦義士順孫孝子不則蠢然塊然草木昆蟲等耳  
至聖垂教大而倫常功業小而飲食日用無所不寓不必  
盡出膠庠之中莫非沐浴詩書之澤雖極頑冥無知

往往頰首謁

聖睹車服禮器而化其難馴之氣譬諸東風解凍和氣飲人其神妙有莫可名言者臺以海外地明季通商始有漢人迨鄭氏道路舊家世族或從而東生聚有年而絃誦猶未廣也越至于今輸誠納土島民得覩天日分設郡縣招徠愈眾十餘年間聲教大通人文駸駸蔚起卽深山邃谷文身黑齒之番皆知向風慕學有識之士咸謂治以道隆道隨治廣從此海波不揚內外如鄒魯矣然石務草創規制苟簡諸羅學宮弗屋三楹更大不稱余備兵于此兼分視學之任每其令以城垣未建學基恐有更易為對葆再三載時

康熙臺灣府志 卷之十 藝文

三十九

怒余懷今余瓜期已屆諸生以舊基甚吉欲謀拓新而諸羅及臺鳳三城營建尚未有日則先大吾夫子之宮又務之當急者也余雖不敏何敢以五日京兆諉之後之君子旣捐俸為倡復商

諸君子者力難獨任也尊

師好義之名又不敢自有也

送臺鎮穆公擢掌禁軍之京序

高拱乾

國家大一統威德丕丕將帥得人其出奠封疆入典宿  
衛克膺心膂股肱之寄者邁軼前古我

皇上聖神文武削平吳耿諸逆如殪封豕聲靈震疊重譯  
獻琛臺灣橫峙海外為偽藩鄭氏逋逃藪望風納土  
悉為郡縣濱海之民莫不相慶于野於是設文吏以  
治之勁卒萬人更番戍守油幢王帳之選最難稱  
大總戎穆公由禁近出鎮海壇移副浙將軍康熙三十  
年春臺鎮虛席

天子瞻念四省藩蔽之地遠人新附宜拊以持重大有為  
之將吏知 公昔在海壇得兵民心復命都督臺軍

康熙臺灣府志 卷之十 藝文

四十

而謫庸如拱乾亦于明年三月謬蒙  
特旨來巡東土與 公和衷協力共宣

聖主綏柔荒服之德意今 公勲績懋著入掌禁旅臺之  
番民部曲渡海籲畱不可得節旄將行羣情依繫余  
受 公教益良厚何能愬然于懷也夫人臣之事君  
也非盤錯無以見長非貞苦罔以表志而豪傑不器  
之士用諸內外而咸宜任以將相而兼當臺灣氛稜  
雖銷窮瘡晷昧日對文身雕題之番衆與初被聲教  
之餘黎曠悍陰鷲幻若蜃市官斯土者竭其目心思  
綏輯調劑猶不免于牽制怨望匪特風濤險遠氣候  
乖殊宦釜生塵舉目蕭條已也然幸

聖明洞灼萬里速報政之令懸不次之擢故文武將吏咸  
感激思奮從滄溟絕嶠中困心衡慮淬勵其才華氣  
骨爲

朝廷用 公智勇忠實勞苦功高歷海徼巖重之區滿漢  
兵士番民畏威懷德所謂內外咸宜將相兼裕克膺  
心膂股肱之寄者非其人乎旣以伏波橫海之偉望  
贊虎賁龍驤之機務

天顏顧問恩禮有加其再祜東南拜彤弓路車之錫皆于  
此行卜之矣爰爲吟折柳贈別之詩以附饒歌之後  
牙旗風正惜離羣島嶼全收萬里雲鯨海長留銅柱  
烈鳳城新典御林軍功高閩外頻推轂別後天涯只

憶君何日平原春草綠驕驍重聘五花文

詳請緩徵帶徵稿

周元文

為正供例應開徵民力實苦不繼急請寬期以示撫恤事查得臺郡孤懸海外屢歲歉收今年亢旱之後繼以颶風既經罹此災傷而成似難期望民心惶惶實有朝不謀夕之慮前據各縣申報前來卑府隨卽轉報在案惟是定例開載凡被災州縣于具題之時錢糧先行停徵十分之三等語遵行已久今查臺屬正供粟石向係十月開徵若遵照成例先徵七分則此等灾黎自救不贍遑顧輸將必致羣情疑懼急遽堪虞若竟為寬緩則距明歲五月奏銷之期又為日無幾茲據該縣會詳懇緩開徵以示撫恤等由前來



卑府近閱邸抄本年七月內于欽奉

上諭事案內江南浙江兩省報災業蒙

大部議覆將應徵正項錢糧暫緩兩月等語合無仰  
籲憲仁俯照江浙緩徵之例恩賜覈轉俾海外孑遺  
稍甦殘喘官民頂戴鴻慈于罔極矣四十六年十月初十日詳奉巡撫都院張 批如詳緩徵繳

第二詳稿

為海外疊被災傷窮民困苦已極籲懇速請緩徵以  
甦民命事康熙四十七年閏三月二十八日據臺鳳  
諸三縣里民吳信番民猫腰礁等連名僉呈前事該  
卑府查得臺郡孤懸海外地瘠民貧四十六年又罹

旱灾百姓困苦已極幸荷憲恩飭令造冊題報復又  
詳允緩徵瀕海灾黎已有更生之慶矣茲奉 部文  
已照分數蠲免其餘應徵粟石仰蒙憲飭作速出示  
開徵而各屬里社庄民僉以疊際荒歉之後餬口甚  
屬艱難又值農事方興播種尙少子粒紛紛哀籲卑  
府伏查臺民之困苦原屬情真而奉文開徵之日已  
值造報奏銷之時無論臺鳳二邑尙有舊欠難完抑  
且此等窮黎曰食不敷萬難責令輸納即使下吏徒  
受處分終于正供無裨所當仰請憲仁俯念海外重  
地民困堪憐將臺鳳諸三縣四十六年分應徵粟石  
緩其徵比于康熙四十七八兩年帶徵全完則是一

轉移間而民困得以稍蘇正供易于催納國課民生  
兩有裨益濱海殘黎頂戴

皇仁當與山海同高深矣四十七年六月初七日巡撫都

察院張 題七月十五日奉

旨這應徵粟石着照該撫所題帶徵該部知道

詳請 題蠲臺屬五十年正供粟石稿

周元文

為欽奉

上諭事卑府查看得康熙五十年分地丁錢糧奉

特旨行蠲免除人丁一項遵照蠲免外查臺郡地畝俱徵

本色正供粟是以不在蠲免數內但同屬地畝所徵

之賦稅應與澎湖地種折徵之銀一例請蠲再有鳳

邑各社土番丁口額徵粟亦係土番丁米卽如漢民

人丁并入正供穀項內奏報又有鳳邑額徵社餉與

諸邑額徵社餉一項因土番不諳耕種原撥定地土

與土番捕鹿每歲徵收餉銀卽如漢民田畝賦稅以

上土番丁米與社餉兩項若不蠲免則

皇恩浩蕩止及漢民而不及土番似應一例請蠲使土番同被

皇仁至于三縣額徵雜項餉稅卽如內地各郡無額稅銀應否免徵卑府飭令各縣造具條款簡明清冊隨文申送伏祈憲臺核奪轉請咨明

大部以便遵行四十九年十二月廿一日詳五十年正月二十五日奉布政使司牌行爲查

上諭內係

赦免地畝人丁並未并免米粟與雜稅等項况康熙二十六年錢糧曾經奉

康熙臺灣府志 卷之十 藝文

四十五

赦其臺屬雜稅并米粟是否并免亦有舊例可循今據前由合行駁查爲此牌仰該府官吏照依事理立即查明舊例詳奪無得率混三月十一日再詳該卑府查得欽奉

上諭蠲免五十年地丁錢糧緣臺灣地畝徵收本色而各項餉稅又與地丁一疏奏銷前經詳請憲示續蒙憲檄駁查二十六年舊例卑府旣卽轉行三縣去後茲據該縣詳覆前來卑府復又檢查二十六七兩年奏銷底冊其正供稻粟及番丁口米俱係蠲免而今次自必照例邀

恩似無容置議矣惟是番社餉稅雖屬雜項錢糧實與正

供地丁一冊奏報一例處分並無分別非同內地正  
雜判然處分異等也合無詳請憲臺俯念海外編氓  
恩賜轉詳

題請與正供稻粟番丁米口一體蠲免庶羣黎咸沾膏澤  
感佩鴻慈直非淺鮮矣四月十一日司詳院批 查  
康熙二十六七兩年蠲半錢糧

上諭內云地丁各項錢糧盡行豁免故將內地額徵糧米  
與臺屬額徵供粟俱行蠲免今次

上諭除漕項錢糧外又奉指明應蠲五十年地畝人丁銀  
兩數目自與前次

上諭不同况現今內地各屬額徵糧米奉

康熙臺灣府志

卷之十 藝文

四十六

部盡撥本年兵糧並未蠲免其臺屬額粟應否請蠲  
仰再細釋二十六七兩年并今次

上諭妥議通詳繳四月二十六日布政使司覆詳四月二  
十九日又奉巡撫都察院黃 批

上諭內蠲免地畝人丁銀兩數目已經明白指示并未蠲  
免糧石且各省所屬州縣止徵本色不徵折色甚多  
俱不見

題請蠲免况此等蠲免乃亘古未有曠典  
洪恩應出自

上裁不便又請量免以滋煩瀆也七月初六日又詳該卑  
府看得臺灣僻處海疆民皆耕種為活故田畝賦稅

卽以本色輸納惟正之供自入版圖以來相沿至今  
奉行無異而康熙二十六年奉蠲上下各半年錢  
糧遂亦以粟石題請一例邀免在案是

皇恩浩蕩先經溥徧遐陬而海外羣黎蚤得均沾雨露矣  
近蒙列憲欽奉

恩綸大張告示曉諭將九省應徵五十年錢糧盡行蠲免  
黃童白叟共樂昇平而黑齒雕題更得恭逢

異數歡忭踴躍之下已將五十年正供擬為一體蠲免茲  
蒙憲檄行知院憲批詳以三縣額粟不在免例不便  
據情題請甫經奉行出示而三縣里民人等卽不禁  
急迫倉皇在名里社番民竊亦知上憲之意原出矢

康熙臺灣府志 卷之十 藝文

四十七

慎矢詳但以海外旣隸編氓荒服尤厪

宸顧向來蠲免均得一視同仁而

曠典特隆反使獨遺臺壤况以臺地正供粟石卽同內地  
田畝錢糧兼以鳳邑番丁皆資收穫以為完納則臺  
灣所收供粟更與本色漕糧秋米迥不相侔施同異  
受宜三縣民番之僉連呼籲也查各該縣會詳情形  
果屬里社民番呼籲迫切而所引奉天府尹廖題請  
蠲免米豆之例亦復相符相應據情轉詳援例具題  
雖

恩澤出自

睿裁而海邦數百萬民番均沾憲慈於無旣矣七月三十

日巡撫都院黃 題為籲懇

天恩事康熙四十九年十月初三日欽奉

上諭直隸奉天浙江福建廣東廣西四川雲南貴州各巡

撫府尹所屬康熙五十年應徵地畝銀共七百二十

二萬六千一百兩有奇應徵人丁銀共一百一十五

萬一千兩有奇俱着察明全免并歷年舊欠一百一

十八萬五千四百兩有奇亦俱着免徵欽此欽遵准

到部咨隨即刊示通行所屬徧行曉諭宣布

皇恩各屬紳衿耆民人等無不籲呼感激頌戴

皇仁僉呈鳴謝經代

題在案嗣據布政司糧驛道會詳據臺灣道府移詳內稱

康熙臺灣府志 卷之十 藝文

四十八

據臺灣鳳山諸羅三縣各里番民人等具呈內地地  
畝額編有本色折色之分而臺灣地畝悉徵本色今  
內地奉蠲折色止徵本色而臺灣因無折色不得均  
邀蠲免是海外一郡同一地畝同一赤子未免偏枯  
似當一例軫恤等因具

題籲

恩蠲免前來因

上諭內止免銀兩並無蠲免糧石字樣隨即批令照舊徵  
收去後今臺廈道復據輿情詳懇

題蠲又經嚴批徵收在案伏念臺灣府屬臺灣鳳山諸羅  
三縣海表遐陬番民雜處惟以墾地種稻為業歲止

一收三縣地畝向來全徵稻粟並無額編銀兩今歲蒙

皇上洪恩蠲免九省地畝人丁銀九百五十餘萬福建亦在蠲免之內而臺屬三縣雖已免人丁等銀二萬餘兩其地畝因係全徵本色稻穀未得一例邀

恩蠲免所有五十年應徵稻粟共一十三萬八千餘石例應于十月收成之候催徵完納查三縣現在存倉歷年餘剩穀六十五萬餘石每年支給兵米折穀六萬七千餘石俱在存倉舊穀內支給今五十年應徵粟石疊據該司道懇詳具

題蠲免隨面商督臣范亦以事關民情理合

康熙臺灣府志 卷之十 藝文

四十九

上聞可否俯念海外歷年安分急公番民特與蠲免以資培養

洪恩出自

聖主不敢冒昧具

題謹繕摺密奏伏乞

睿鑒施行九月二十二日奉

旨該部議奏十月初二日奉

旨臺灣府屬五十年應徵粟石已經徵完在官雖蠲免小民無益其應徵五十一年粟石着行蠲免

行豁吳國琛薛雲樹等沙壓無徵賠累正供粟一  
千七百八十三石四斗五升零就各里報墾陞  
科田園勻攤稿 周元文

監生吳國琛呈爲萬死一生事痛琛父吳吉在日被  
惡胥張元套騙將伊荒瘠上則田一十九甲三分年  
應徵粟一百六十九石八斗四升賣父銀二十兩父  
在日已變產賠課及父三十八年病故琛無奈又將  
家貲賠盡慘無棲身之地僅存妻子樂歲有啼饑之  
慘致累歷任縣主代賠業蒙解憲 比遂蒙前任太  
老爺靳恩免又蒙太老爺衛憐免可質至四十四年  
現任縣主老爺宋開徵知琛課累家貧所凡比較徒

付一歎今蒙太老爺親比琛自知課粟難免但連年  
荒饑家貧莫措將欲賣妻子難舍結髮之情欲賣子  
乎必至絕後之慘倘賣妻兒可免後來之賠雖割情  
絕後亦所甘心但今賣賠于前而後日之累又至可  
責之妻兒有盡而賠累之課粟無窮輾轉思維必死  
方休所有一生之路者惟望太老爺格外施仁耳無  
奈瀝情匍訴叩乞憐察行縣主清勘果否拋荒有無  
賠累生死銜結公候萬代切呈四十八年二月二十  
三日批仰

鳳山縣速查報

縣詳駁稿



爲照額徵粟石關係國儲難容虧缺以熟作荒捏報  
冒免更于嚴例茲因吳國琛以田荒賠課具訴批查  
而該縣詳報荒蕪沙壓上中則計二百四十甲零歷  
年欠粟計五千五百石有奇並無下則田地夫農民  
之胼胝原擇膏腴之地豈有舍膏腴之地拋荒而盡  
力于下則之地乎無是理也況數年來雨水不齊沙  
壓田地胡爲乎來哉且臺灣開闢年久人民輻輳淡  
山窮谷之中尙且請墾芟除耕種又誰肯棄已成上  
中則田地拋荒如許之多乎其捏飾混報希圖冒免  
此又不待問而知也卽或間有一二果係拋荒該縣  
見聞真確而淡水港東西里社新墾甚多一望無際

且多係有水源灌溉膏腴田地其所報陞科者十未  
有一又俱以下園科則具報此本府親歷其地所目  
覩者也然此盈彼縮該縣職司民牧何難設法通融  
以盈補縮合就駁查爲此牌仰該縣官吏照依指駁  
事理立即冊報各戶沙壓拋荒地逐一按戶親勘  
文明甲數出具並無捏報察出甘罪印結造冊申報  
仍將淡水港東西里社新墾田地備細檢查原請四  
至及報課某則若干逐一勘文按戶按畝造冊亦具  
並無漏報印結一併詳送務要以盈補缺無得任聽  
胥役乘機嚇詐以上作下以田作園徇情混報或經  
訪聞或被告發官則詳參胥役立戮杖下本府一片

婆心上為國儲下恤民生言出法隨毋得自貽伊戚  
慎速

十二月初三日縣詳

查看得賦從田出田應佃耕設或土田崩陷佃丁逃亡則維正之供未見其急公恐後者也卑職奉調到臺接徵伊始查吳國琛等各戶額賦纍纍升合不完究其逋欠之由皆因所有之田水衝沙壓從而歲歲拋荒課存人亡不一而足既不忍嚴行催徵又無由為之開豁因循五載賠賦至今統而計之不下數千餘石蓋緣卑職身任地方凡此之人等于無告是以不惜多方賄墊始得如期奏銷茲蒙憲臺察閱比簿

行將失額田畝逐一查明寓撫字于催科莫足永蘇民困卑職承宣德意理應刻期申詳緣田數繁多里庄星散乃為詳明履勘俾以少無遺漏仰蒙憲飭遵照行查續據典史葉廷獻詳報丈勘田園以及拋荒田畝各冊前來卑職按冊查考酌量攤勻補縮于盈哀多益寡降其科則俾失額之地可以勉力招耕益以正供俾新墾之田不致從中隱漏供課適合輸納惟均一攤勻間而使數年賠累之田一旦得免拋荒之苦雖卑職前此賠墊數千石今已無容復問而自此以往田無失額佃不逃亡國課民生何莫非憲臺拯救之力現將改定科則以及攤補粟石清冊隨文

呈送伏候察奪批示以便改入比簿查照催徵至于  
吳國琛薛雲樹薛禹等田地既經改降科則自應設  
法招佃開墾輸完課粟如或不能招墾完納請以此  
項田畝出示另招墾耕以免後累者也 批如詳行  
繳

審革阿猴搭樓等各社通事給追原騙粟石審語

并酌定通事辛勞使費等項立木以垂永遠周元文

審得阿猴等五社通事許安等皆奸狡之徒也緣各  
社土番賦性痴愚不識漢字畜以異類肆其魚肉固  
非一朝一夕矣臺灣自開闢以來各邑土番俱有正  
供粟石因其語言各別不能赴倉完納每社設有通  
事代其催辦供役議貼辛勞粟石此係因地而施不  
得不然也詎意事久弊生借各項使費名色於正供  
之外加派數倍將本年之粟盡取無遺無怪乎阿猴  
等社土番聚集呼冤連名僉控也揆其情事總緣番  
納正供交穀既無收字完糧不給官串一任通事派

徵言欠卽欠言完卽完今經當堂研訊追出通事曰  
收清簿發經歷司與書記土官三面清算四十六七  
兩年正供俱已全完且有多收粟石各數倍不等許  
安等猶敢逞其如簧以爲盤運上倉耗折夫卽有耗  
折倉費何至如許則其濫派侵肥已百喙無辭矣其  
多取粟石本應按數追給姑念脚運耗折不無所費  
各量追數百石分給土番許安等從寬枷責俟追完  
日行牌革逐可也

酌定番粟

一每石加耗粟三升 一每全戶番夫婦年貼  
粟二石 一另發給各營兵米粟所需車工船

稅等項土官應自料理以上各條刊立木榜暨  
各社通要去處使其家喻戶曉以垂永遠之規  
咸使遵守

申請嚴禁偷販米穀詳稿

周元文

為請申嚴偷販米穀之禁以足民食事竊照臺郡當初闢之區地廣人稀菽粟有餘原稱產米之地自數十年以來土著之生齒既繁閩廣之梯航日衆綜稽簿籍每歲以十數萬計一郡三邑出產幾何即以歲收豐盈僅足以供本地兵民日食况所屬三縣惟有鳳諸二邑出產米穀其臺灣一縣地土高燥僅堪種蔗種菁以故郡治人民每皆計日而糴既無隣封接壤可以通融若將鳳諸二邑所產之米聽其一任外販則郡邑赤子勢必告糴無門此海外情形大不同于內郡而米穀販運之禁自不容為之少弛者也况

臺郡自四十一年至今叠際凶荒卽或未經報災而所收實為歉薄夫以海疆要地雖菽粟有餘尙當廣事儲蓄值茲農無餘粟戶鮮蓋藏又安可不加意保釐是以歷經卑府詳明各憲請示嚴禁凡有自臺出港船隻無論營哨商艘俱聽海防同知查驗不許夾帶米穀久經遵行在案惟是每遇青黃不接內地米價高昂營哨船隻竟以米穀公然夾帶不聽查驗揚帆出港又有商艘通同奸徒每于暮夜之間私用小船偷運大船接濟兼有內地各營員給發牌照來臺以運載庄粟食米為名公然販運種種透越弊竇多端是以去歲夏間每米一石原賣一兩二三錢不等而

旬日之間驟騰至二兩三四錢米價騰湧以致民心  
驚惶茲去冬收成更薄而人民之聚集愈繁現今甫  
及春耕米價每石卽貴至一兩五六錢將來青黃不  
接又不知作何高昂若爲防患未然不得不預請憲  
臺嚴加示禁并賜通飭各協營凡有營哨船隻自臺  
出港務聽海防同知加謹查驗不許夾帶米穀出港  
如有不遵查驗揚航直去許該廳詳明拏究如此則  
未雨綢繆庶可以稍爲補救而海外官民均戴憲慈  
于無旣矣五十年三月十二日詳總督部院范 批  
仰候給示查拿並移行提督

暨總兵官轉飭仍候撫都院批示繳

巡撫都院黃 批商艘通同奸徒暮夜偷運仰布政  
司移飭該道府廳嚴禁并加意查拿重究營哨船  
隻夾帶販運候移咨提鎮查禁仍候督部院批示  
繳

申禁無照偷渡客民詳稿

周元文

爲再請申嚴偷渡之禁以固海邦事竊照臺郡乃海外荒區地瘠民貧當初闢之始人民稀少地利有餘又值雨水充足連年大有故閩廣沿海各郡之民無產業家室者俱冒險而來以致人民聚集日衆經蒙上憲洞悉情形設法嚴戢已不啻至再至三矣詎意奸頑商艘并營哨船隻輒將無照之人每船百餘名或多至二百餘名偷渡來臺其自廈門出港俱用小船載至口外僻處登舟其至臺亦用小船于鹿耳門外陸續運載至安平鎮登岸以致臺廈兩同知稽查莫及卽間有拿獲通報者亦不過千百中之什一耳

夫以此彈丸之地所出地利有幾豈能供此往來無盡之人匱乏之虞將恐不免且此輩偷渡者俱係閩廣遊手之民其性本非馴良又無家室顧忌無怪乎刁悍日甚而鼠竊之事日見告聞倘此輩再爲飢寒所驅則地方隱害又不知將何底極似當亟爲設法嚴禁者也但臺地旣歸版圖則彼此往來勢難盡爲斷絕若不稍寬其途偷渡者仍難禁絕而偷載者更得重利矣嗣後凡有內地人民欲來臺郡必于原籍該縣具呈開明其入籍者必開明前赴臺灣某縣某里或某坊某社倚傍親友某人其探親友者亦必開明所探親友之住址姓名其貿易者亦必開明住宿

之舖戶姓名方准給照其探親友并貿易之照內仍開明回籍限期此外凡文武衙門非奉公差遣不許濫給照票仍照現行之例俟由廈門防廳驗明出口到臺經臺防廳驗明轉發該縣查明照內開載取具所探之親友或住宿之舖戶甘給存案其入籍者卽追銷照票准其入籍其探親友并貿易者仍查照前限驅回如此旣不阻其來路又可慎其稽查倘仍有不請縣照偷渡者必非良民俱照私越關津例逐名懲處押回原籍則立法嚴而奸民庶知斂跡矣五十年三月十二日詳

巡撫都院批 過臺人民着令各道稽查給照已經



督部院通飭遵照矣仰布政司飭知仍候督部院  
批示繳

總督部院批 仰布政司查照另檄移行遵照仍候  
撫都院批示繳

薛允控告呂學叅案內退出田地三十一甲零充  
為義學公用詳憲批議稿

周元文

該卑府議看得薛允呂學叅二比互爭田地一案退出田地三十一甲零充為義學公用奉批另議造冊詳報卑府細思義學之舉乃所以振興文教作養人才甚盛典也臺灣海外荒島初入版圖諸凡政務尚屬未周荷蒙各憲飭行義學延師課督業經設立舉報在案但芸窓攻苦燈火無資雖欲捐給終非久遠之計今薛呂二家愿將交界之田三十一甲零退出以充義學公用是以虞芮之間田為熟師之永業化

康熙臺灣府志 卷之十 藝文

六十

爭訟為絃歌去驕矜而習禮樂不可謂非善舉也移准防廳取具佃丁湯邦楚等二十三名認佃結狀并保舉鍾起亮充當佃首董理其事計田三十一甲零九厘四絲每甲年交租粟八石計該粟二百四十八石七斗二升三合二勺查本府義學師金繼美自前府延入義學以來課督潛修生徒濟濟相應將前項田地逐年所收籽粒充入本義學半為繼美修脯之用半為寒儒燈火之資斬二比之葛藤長公門之桃李振興文教誠非淺鮮也四十八年三月初五日奉布政使司批 兩造退出之田是否已經陞科每甲應完糧若干今充義學公用其錢糧作何扣納未

據議及仰再查明詳報繳

三月二十七日覆詳

卑府伏查薛呂二姓退出之地三十一甲零原係新墾未經陞科卑府以爲既充義學公用似可免其報墾完糧是以未曾議及且屬瘠薄沙田每甲僅收租粟八石而煽颺折耗與夫收租之斗改折倉斗每石約去加二每甲止得淨粟六石四斗卽照下則起科應扣納正供五石五斗則每甲僅餘粟九斗矣夫臺郡僻遠之區文教漸興貧窮子弟多有志上進而苦于膏火無資卑府現在廣爲招集每月兩次親詣義學獎勸海外孤寒方在咏歌憲德無疆應否俯如前

康熙臺灣府志

卷之十 藝文

六十一

議賜免陞科所收租粟半爲延師修脯半爲貧士膏火之資弘仁出自憲裁非卑府所敢擅便也四月二十八日奉

巡撫都察院批 仰飭照例報墾完糧餘作義學公用繳

詳請臺屬脩理戰船捐俸就省脩造以甦民困

初詳文稿

周元文

為戰船屆期亟請修造以資巡防事細查此案應折造船三十一隻除澎湖右營三號趕繕船一隻係該營領價賠修外尚應折造船三十隻與福州府對半均分卑府應折造一十五隻臺郡僻在海外百物不產一切木料以及釘鉄油蔴風帆棕絲等項盡須遠辦于福州紆迴重洋脚價浩繁又有遭風飄失之虞卽採買之各料概係零星搭運來臺一物不到不能興工及至到齊不可以日月計算其在臺採買樟料則苦于鋸匠稀少不能卒辦且入山逼近野畝最慮

康熙臺灣府志 卷之十 藝文

六十二

生爨而山多鳥道先需肩運出山方可車運至廠亦必經月而後至今以十五船之樟料寔屬萬難况扣至興修之期正值農忙之候勢必重奪農時荒工失業于民又為苦累卑府旣稔知種種艱虞情愿捐資賠墊委員前赴福州省城照依原船丈尺從新打造庶于軍工不致遲悞惟是打造船隻例應該營委員協同監造其堪駕駛之船仍令一例駕至省城其不堪駕駛之船卽就近在臺變價至于造完之後亦應照依駕赴福廠之例監造之員出具收管領駕回營伏祈憲臺俯賜轉詳檄行該營委員赴省協同監造并帶領舵水于竣工之日領駕回營則頂戴憲恩于

無既矣

再詳文稿

爲承修船隻數多匠料募辦艱難仰祈恩賜暫歸福  
廠興修免悞軍工事竊照承修戰艦前蒙詳奉督院  
批定臺灣并道標共戰艦九十八隻內一案四十六  
隻一案三十一隻此兩案令臺灣府與福州府對半  
分修其餘陸續屆修船共二十一隻俱歸臺廈道承  
修寔屬至公固當永爲遵守惟是臺廈道衙門承修  
爲戰船期屆請修等事案內大修船十隻又船隻已  
屆修期等事案內大修船二隻此兩案俱在勘估請  
修而臺灣承修爲戰船屆期亟請修造等事案內折

造船三十一隻應與福州府對半分船一十五隻  
亦現在勘估請修則道府總計共船二十七隻其承  
脩雖有道府之分至于採辦物料動用工匠凡在臺  
廠均同一體夫以海外荒僻之區石物不產其造船  
料物無不遠購于福州種種艱虞已悉前詳至于工  
匠臺郡不足三十人以如許船隻斷不能同時並舉  
若逐船修造必至報竣無日勢出萬難且歷案留臺  
興脩者不過三五船或八九船而止從未有若是之  
多是以輟轉躊躇惟有請將臺廈道衙門承修兩案  
之船一十二隻暫歸福廠就料興修蓋在福廠辦料  
易而工匠多又不須遠運之腳費原無十分賠累但

此兩案之船業經奉憲批定令臺廈道衙門承修今部文轉瞬即到倘若彼此推諉仍然遲悞而臺廠勢又斷難兼修此兩案之船萬不得已情愿于部價津貼之外再捐俸銀每船幫貼五十兩其十二船共幫貼銀六百兩不過以同寅之誼暫煩福州府代為脩葺而此兩案戰船仍在臺廈道承脩數內並非永歸福廠其于憲令亦無更易伏祈鑒察恩賜轉詳院憲俯允所請庶軍工不致有悞而承修之員得免遲延之愆矣

三詳文稿

為承脩船隻數多匠料募辦艱難等事案查臺澎五

康熙臺灣府志 卷之十 藝文

六十四

營屆期應大修船兩案共計一十二隻係卑府護理憲篆任內經手應卑府承脩之船故于奉行勘估之後即經披歷艱虞通詳列憲請將此兩案一十二隻之船暫歸福州府代為修葺其于應領部價津貼之外情愿每船津貼銀五十兩一十二隻共捐津貼銀六百兩奉撫憲批行藩憲查議幫銀是否足用有無偏累其船能否駕至福廠續奉前署督院以前任批定分修難以紛更飭令領價辦料卑府敢不凜遵但伏思原詳乃因卑府本任內尚有應折造一十五隻係同時屆修而船隻數多匠料募辦俱難出于萬不得已故情愿額外捐貼暫煩福州府以同寅之誼代

為修葺以求公事無悞不過一時權宜並非永歸福  
府業經聲說最明委非敢有推托之心忘思更易且  
查修船料物俱產于內地其福廠乃省會之區百物  
聚集購買既便工匠又多可以一呼即至較之海外  
僻遠之郡其難易之相去真不可同日而語况又自  
省接運來臺其間歷兩重大洋實出萬難如釘鉄油  
蒜等項猶可整船裝載至於桅杉各木乃因風浪洶  
湧其勢斷不能整船載運是以就商船附搭夫一物  
不齊不可以興工而幾經紆折擔延委難以時日計  
筭此乃購運料物之難虞較諸福廠朝發而夕至者  
固有天淵之別矣再如臺郡工匠稀少遇三兩船猶

可足用船隻數多若逐漸興修則竣工無日勢必遠  
募內地如漳泉各府有同時屆修之船則雖有重價  
恒苦應募無人此乃僱覓匠工之難虞較諸福廠之  
朝呼而夕至者又不啻有天淵之別矣更如臺郡止  
出樟木一項乃在深山窮谷之中逼近生番雖十分  
謹慎猶恐生端構釁如以紆迴鳥道即寸板寸木皆  
須人力肩運出山而後車運至廠其需用人車民力  
挽運未免廢時失業其內地購買之各料自屢搭運  
惟桅木與大吉杉木兩項商船每搭一株而船即危  
險為資本生命所係去歲前憲承修三船以搭運無  
幾之木料即有一船遭風淹死三十餘人是以每遇

運料而船戶畏懼怨聲沸騰凡此遠運料物致成商  
民之大累又悉係福倣之所未有者也夫以臺福兩  
倣承修戰艦其難易如此判然而卑府又有額外之  
捐貼委無偏枯實屬足用且此案一十二船俱屆大  
修業經卑府會同營員勘驗而軍工定例森嚴設若  
苟可辦理安敢不竭蹶從事以期保此微程無如再  
四躊躇實出於事有萬難將來勢必遲誤與其坐受  
處分莫若仰為呼籲再求上憲之憐察伏祈憲臺府  
察種種艱慮恩賜詳移各憲仍將此案一十二船暫  
煩福州府以同寅之誼代為修葺卑府情愿每隻船  
再捐貼銀二十兩共一十二船連前通共捐貼銀八

百四十兩隨文批辭并祈憲臺轉移司庫卑府誠恐  
將來上候軍工下干嚴例故不惜多方賠墊以求公  
事得完而與福倣興修寔屬足用并不致稍有偏累  
倘得邀恩准允則海外官民均戴弘仁於無卽矣

四詳文稿

為修船之辦料維艱商民之苦累堪憫籲請憲慈格  
外變通以固海疆以濟軍工事竊臺灣戰艦開闢之  
初係分派通省廳員承修至三十四年改令通省州  
縣至三十九年復又議歸通省道府凡此屢為變易  
者總以戰艦係通省公事自應責之通省之官方無  
偏枯之嘆而軍工例限緊迫亦眾擎易舉之意也乃



乃于四十七年奉前督憲梁飭將臺澎戰艦九十八隻內派定七十七隻令卑府與福府對半分修餘船二十一隻令臺厦道承修既經上憲立法卑府何敢再為置喙但臺郡有萬萬不能承修之勢若不預為呼籲則將來必致貽誤軍工是以不避斧鉞披瀝詳請伏望憲慈俯賜憐察伏查臺郡遠在海表僻處遐方一切釘鐵油蔴以及大小木植皆無出產必須遠購于延建福州等處由海道歷重洋其人工船脚之浩費已不待言若遇風信平和而零星搭運一船之料非一二月不能運完倘或風信不順更難計日或有駛至洋中陟過颶風飄至粵省甚有全船覆没人

物無存者縱物料尚可重購而軍工則已誤期矣况大小桅木以及吉木等項係至重至長之物以一舟而裝兩根則過于沉重碍于行駛若止載一根則船即偏重不能平穩凡此裝載過洋殊為商船之大累從前為運料覆沒俱經通報有案是以內地商艘一聞臺郡承修戰艦皆別往貿易鮮有到臺是其艱虞概可見矣即如臺郡所產樟料一項俱在南北二路深山窮谷之中計程千有餘里既無舟楫相通又鮮人夫搬運必須募番荷負出山方得車運至府勢非三五月不能往遠若遇霖雨泛漲道路泥濘尤難計時而至况出樟處所逼近傀儡生番最易構釁是此

樟枋一項雖非涉海遠購其挽運之艱難脚費之浩  
大比購之內地更屬萬難况各項工匠在從前原有  
二三十名策應查自近年以來或改行易業或逃回  
原籍現在并無一人若興工修造勢必遠赴漳泉兩  
府僱募俱以重洋浩渺卒無應募之人船工重務斷  
不能無匠而成此又事之至難者也是以去年將卑  
府承修折造十五船護道任內承修大修十二船詳  
明駕赴省啟修造今循例詳請等事案內屆期應修  
船四十五隻已奉撫憲會題請修在案此係軍工重  
務自當竭力承辦豈容貽誤卑府情愿將折造船每  
隻幫貼銀八十兩大修船每隻幫貼銀六十兩小修

船每隻幫貼銀四十兩共捐銀一千三百六十兩將  
此二十三船或併歸福府或令福府廳員或閩侯二  
縣代為修理以本地之官辦本地之料僱本地之匠  
既無重洋運儀之險商民苦累之慘又無脚費之浩  
繁與工匠之難覓則諸凡便易呼應得靈而又有卑  
府之捐貼斷無賠累之處似此一為變通戰艦得以  
如期告竣其有益於地方軍工良非淺鮮若以從前  
之官曾經在臺興修何獨卑府推諉但查從前道府  
承修各案凡一切拖運樟枋物料俱係責之于民而  
臺郡之民非開張生理即係務農耕種皆不能出身  
策應均按戶口出銀僱番車運其中苦累難以枚舉

一、隻卑府應分修船三十九隻，共船六十隻。卑府去年已於承修戰船屆期等事案內大修船十二隻，合之今歲承修循例詳請等事案內分修二十三隻。已修過五十船，計至三年以後方屆修期。以三年之幫貼共有三千金而修此一次之船，無論折造大小修總無不敷之處。而臺郡幫貼之銀係各屬官逐漸所出，亦能勉力措處。如此則海外商民永免無窮之苦累，而道府亦無遲悞之愆。不特官民頂戴鴻恩于天，長地久即憲臺亦積無限陰功。將必金紫萬代壽與嵩齊矣。事在激切，故不揣冒昧，披瀝具詳，伏乞憲臺恩賜准允，并立案定例，以便永遠遵照者也。